

Tikeraat ornittagaannik ingerlatsinissamut nunami namminermi sullissiviup pilersinnissaa pillugu Namminersorlutik Oqartussat nalunaarutaat

Tikeraat ornittagaannik takornariartitsivinnillu pilersitsisarneq ingerlatsinerlu pillugit Inatsisartut inatsisaat nr. 25, 28. november 2016-imeersumi § 5, imm. 1 malillugu aalajangiunneqarput:

Kapitali 1

Pilersinnera, taaguutaa aamma angerlarsimaffia

§ 1. Naalakkersuisut sullissivik imminut ingerlatittoq Greenland Visitor Center (GVC) pilersippaat.

§ 2. Sullissiviup imminut ingerlatittut angerlarsimaffia tassaavoq Nuuk, Kommuneqarfik Sermersuumi.

Kapitali 2

Inatsisitigut inissisimaffik aamma siunertaq

§ 3. Sullissivik tassaavoq kiffaanngissuseqartutut, kikkut tamarmik iluaqutissaattut sullissivik imminut ingerlatittoq. Pisortani aqutsisoqarnermut atuuttut inatsisaasunut tunngavigisanullu sullissivik ilaavoq.

§ 4. Sullissiviup imminut ingerlatittup siunertaa tassaavoq tikeraat ornittagaannik, Kalaallit Nunaanni pinngortitamik kultureqarnermillu oqaluttuarisaanermik paasisitsiniaanermut toqqammaviusussanik ingerlatsinissaq.

Kapitali 3

Pisortarisat il.il.

Siulersuisut

§ 5. Sullissivik imminut ingerlatittoq siulersuisunit, sullissiviup sammisaqarfigistut suliassaqarfigisai, aningaasaqarnera aqunneqarneralu pillugit apeqqutini pingaarutilinni tamani aalajangiisartumit siulersorneqarpoq.

§ 6. Siulersuisut Naalakkersuisunit toqqarneqartarput.

Imm. 2. Siulersuisut ilaasortat tallimat tikillugit inuttaqarput.

Imm. 3. Siulersuisut inuttut piginnaasaat tunngavigalugit toqqartorneqarput.

§ 7. Siulersuisuni ilaasortat ukiunut marlunnut piffissalikkamut toqqarneqartarput, toqqaqqinneqarsinnaappullu.

§ 8. Siulersuisut ilaasortat akornanni namminneq siulittaasussartik qinertarpaat.

§ 9. Ileqqoreqqusap nassatarisaanik siulersuisut suleriaasissartik namminneq aalajangertarpaat.

§ 10. Sullissivimmi pissutsit, ilanngullugit siulersuisut inuttaligaaneri, akisussaaffigisaat aamma suliassa, kiisalu sullissiviup aqqissuussaanera pillugit erseqqissagaanerusutut malittarisassiat kapitalit 5, 6, aamma 7-mut naapertuuttumik ileqqoreqqusami aalangersagaapput.

Siulersuisuugallartut

§ 11. Siulersuisuugallartutut atuuffik Inuussutissarsiornermut Nukissiuuteqarnermullu Naalakkersuisoqarfimmit isumagineqarpoq.

Imm. 2. Siulersuisuugallartut § 6 malillugu siulersuisut toqqagaanissaasa tungaannut ingerlaannassapput.

§ 12. Ilulissani Kangiata Illorsuata atugaalernissaata, aammalu tassannga piginnittuunerup sullissivimmut tunniunnissaa pillugu Naalakkersuisut aalajangiinissaasa tungaannut sullissiviup siulersugaaneranik siulersuisuugallartut isumaginnissapput.

Imm. 2. Kangiata Illorsuanik sanaartornermut tunngatillugu sullissiviup soqutigisaanik siulersuisuugallartut isumaginnissapput, aammalu tikeraat ornittagaliernerit pillugit aningaasaateqarfinnik allanillu avataanit aningaasaliisartunik isumaqatigiissutinik atsiugaasunut atatillugu Namminersorlutik Oqartussat suliassaanik isumaginnissallutik, kiisalu tikeraat ornittagaannik avataanit aningaasaliissutitut ilassutissat pissarsiariniartassallugit.

Imm. 3. Sullissiviup missingersuutaata sularineqarnissaa akuersissutiginnissaa, sullissiviup aqutisoqarfianik ilusilersuillunilu aqqissuussinnermut tunngatillugu akuersissuteqarnissaq, kiisalu sullissiviup imminut ingerlatittup ingerlatarinnisaanik piareersaanissamut pisariaqartunik allanik aalajangiussisoqarnissaq siulersuisuugallartut isumagissavaat.

Pisortaqarfik

§ 13. Sullissivimmi ulluinnarni siulersuineq pisortamit, siulersuisunit atorfinitsitaallunilu soraarsinneqartussamit isumagineqassaaq.

Imm. 2. Pisortaqarfiup akisussaaffigisai aamma suliassai il.il. pillugit erseqqinnerusumik malittarisassiat ileqqoreqqusami aalangersarneqarput.

Imm. 3. Pisortap atorfinitsitaanissaata tungaanut siulersuisunut allattoqarfittut atuuffiusoq Inuussutissarsiornermut Nukissiuuteqarnermullu Naalakkersuisoqarfiup isumagisinnaavaa.

Kapitali 4

Ilisimatusarnikkut siunnersuisooqatigiit siunnersuisartut

§ 14. Siulersuisunik siunnersuisussatut ilisimatusarfinnit Pinngortitaleriffimmit, GEUS-imit, Niels Bohr Instituttimit, DMI-mit aamma National Snow and Ice Data Centerimit ilaasortalimmik ilisimatusarnikkut siunnersuisooqatigiit pilersinneqassapput.

Imm. 2. Siulersuisunit inassuteqarneq malillugu qulaani taasatut ilisimatusarnikkut sullissisarfiit ilisimatusarnermut attuumassuteqartutut akuerisaasutut ilisimatusarnikkut sullissisarfinnik allanik Naalakkersuisut peersitsillunilu ilassuteqarsinnaapput.

Imm. 3. Sullissisarfiup suliarisaanik malittarinninnissaq, aamma tikeraat ornittagaanni saqqummersitsinernik paasisiniaanermillu suliarisanik ineriartortitsiuarnissap qulakkeernissaa ilisimatusarnikkut siunnersuisooqatigiit suliaassaraat.

Imm. 4. Ilisimatusarnikkut siunnersuisooqatigiit siulersuisunut paasisitsiniaanermik suliarisanut aamma saqqummersitassanut nutaanut siunnersuutiniq saqqummiussisinnaapput, aammalu manna tikillugu paasisitniaanermik suliarisat saqqummersitsinerillu nalilersorsinnaavaat.

Imm. 5. Siunnersuisooqatigiinni pissutsit suliaqarnerillu pillugit erseqqinnerusumik malittarisassiat sullissiviup ileqqoreqqusaani aalajangersarneqassapput.

Kapitali 5

Tapiissutit aamma isertitat

§ 15. Siunertamut aningaasanut inatsimmi immikkoortitat aningaasaliissutit tunngavigalugit ingerlatsinissamut tapiissutitut aalajangerneqartumik sullissivimmuut ingerlatsinissamut tapiissutiniq Naalakkersuisut ikiorsiisinnaapput.

§ 16. Siunertamut aningaasanut inatsimmi immikkoortitat aningaasaliissutit tunngavigalugit sullissivimmuut sanaartornermut tapiissutiniq Naalakkersuisut ikiorsiisinnaapput.

§ 17. Sullissivimmuut sanaartornissamut aningaasartuutiniq kommunimit aningaasaleeqataanissaq pillugu Naalakkersuisut aamma kommunit isumaqatigiissutiniq atsiugaqarsinnaapput.

§ 18. Sullissivimmuut ingerlatsinissamut tapiissutiniq kommunimit aningaasaleeqataanissaq pillugu Naalakkersuisut aamma kommunit isumaqatigiissutiniq atsiugaqarsinnaapput.

§ 19. Siunertarisaminut naapertuuttumik sullissivik tikeraat ornittagaannik ingerlataqarsinnaavoq, tassungalu atasutut isertitanik pissarsiaqarsinnaalluni.

§ 20. Siunertarisaminut naapertuuttumik sullissivik aningaasaateqarfinnit, kattuffinnit aamma suliffeqarfinnit, kiisalu pisortani qullersaqarfinnit tunissutitut, tapiissutitut assigisaatullu ittut isertitat pissarsiaqarsinnaavoq.

Kapitali 6

Naatsorsuutit aamma kukkunersiuinerit

§ 21. Sullissivimmuut naatsorsuuserinermut ukioq tassaavoq ukioq naatsorsuiffik.

§ 22. Kalaallit Nunaanni ukiumut naatsorsuutitut inatsimmut peqqussummik qaagumulluunniit atuuttumik najoqqutaqarluni sullissisarfik ukiumoortumik nalunaarummik tunniussaqaqtarpoq, Namminersorlutik Oqartussat ataanni sullissiviup imminut ingerlatittuunerata nassatarisaanik sanioqqutitsinerit ilanngullugit.

§ 23. § 22-mut naleqqiullugit naatsorsuuserinermi malittarisassianit sanioqqutitsinerit naatsorsuuseriaatsimut atugarisap ataani suliffeqarfimmuut ukiumoortumik nalunaarummi nalunaarsorneqassapput.

§ 24. Naalagaaffimmit akuerisaasumit kukkunersiuisartumit, nunatta karsiata naatsorsuutaanik kukkunersiuisartumit Inatsisartut toqqagaannit ukiumoortumik naatsorsuutit kukkunersiorneqassapput.

Imm. 2. Kukkunersiuisup pisortatut kukkunersiuinermik ileqqorilluakkamut naapertuuttumik ukiumoortumik naatsorsuutitik kukkunersiuissaaq, ilanngullugulu suliffeqarfiup naatsorsuutitut atororisaanik aammalu pissutsit sinneri sukumiisumik misissussallugit.

Imm. 3. Aningaasaliissutitik aqutsinermut atatillugu inatsisitik unioqqutitsinernik, imaluunniit annertuumik pingaarutilinnik najoqqutassanik sanioqqutitsinernik kukkunersiuisoq paasisaqassaguni tamakku pillugit sullissiviup siulersuisuut aamma Naalakkersuisuut erniinnaartumik kukkunersiuisoq erniinnaartumik nalunaaruteqarnissaminut pisussaavoq.

§ 25. Suliffeqarfimmik nalilersuinerimut taassumalu ukiumoortumik nalunaarusiaanut pingaarutilittut isigineqartariaqartumik pisortaqaqfiup paasisutissat tamakku kukkunersiuisumut tunniutissavai.

Imm. 2. Taassuma pisariaqartitaanik misissuinernik isumaginninnissamut pisortaqaqfik kukkunersiuisumut attaveqartitsissaaq, aammalu kukkunersiuisup suliarisaminut pisariaqartuusutut isigisaanik paasisutissanik tamakkuninnga aammalu ikiorneqarnissaaq kukkunersiuisup pissarsiarissagai isumagissallugit.

Imm. 3. Pisortaqaqfiup atsiugaqarnermigut naatsorsuutit allassimaffiat (protokollati) akuerissavaa.

Kapitali 7

Ileqqoreqqusani pissutsit

§ 26. Sullissivimut ileqqoreqqusaaq Naalakkersuisunit akuerineqartussaaq siulersuisut suliarissavaat.

Imm. 2. Ileqqoreqqusami allannguutit Naalakkersuisunit akuerineqassapput.

Kapitali 8

Atuutilernera

§ 27. Nalunaarut ulloq 7. november 2018-imi atuutilerpoq.

Namminersorlutik Oqartussat, ulloq 5. november 2018

Aqqalu Jerimiassen

/

Jørn Skov Nielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut